

EH Bildu talde politikoa

Grupo político EH Bildu

Ijentea, 1 - 20003 Donostia

Tel. 943481027 eh_bildu@donostia.eus— www.donostia.ehbildu.eus -

MOZIO ARRUNTA

**ARGIAREN PREZIOAREN IGOERAREN ONDORIOZ, GIZARTE LARRIALDIETARAKO LAGUNTZAK
HOBETZEKO BEHARRA DELA ETA**

EH BILDU udal taldeko bozeramaile Reyes Carrere Zabalak, Udalbatzaren Organo Araudiko 98. artikulua oinarri, honako MOZIO ARRUNT hau aurkezten du, argiteriaren prezioaren igoeraren ondorioz, gizarte larrialdietarako laguntzak hobetzeko beharra dela eta.

JUSTIFIKAZIOA

Ekainean indarrean sartu zen Hego Euskal Herrian argia tarifikatze sistema berria, atsedendu orduetan salbu energia kontsumoaren prezioa garestitu duena. Energia aurrezteko, eraginkortasuna eta autokontsumoa sustatzeko neurri gisa aurkeztu du Espainiako Gobernuak. Baina asmo horiek ezerezean geratu dira azkeneko asteetan ikusitako prezio igoerarekin.

Irailaren 1ean argiaren prezioak beste marka historiko bat jarri zuen Hego Euskal Herrian: orduko megawatt bakoitza 132 euro, hain zuzen ere. Horrez gain, beste partida energetiko batzuk ere garestitu dira; hala nola, petrolio 70 dolarretik gora dago, gasolina % 21,3 garestitu da duela urtebetetik, eta gasolioa, % 18,7.

Argindarraren faktura garestitzeak zuzenean eragiten du inflazioan eta horrek enpresen eta partikularren erosteko ahalmena ahultzea dakar. Kontsumorako Prezioen Indizea (KPI) % 0,4 igo zen abuztuan, aurreko hilabetearekin alderatuta, eta urte arteko tasa % 3,3koa izan da, uztailera baino lau hamarren handiagoa eta 2012ko urritik izandako tasarik altuena, Espainiako Estatistika Institutuak argitaratutako datuen arabera.

Gauzak horrela, gero eta gehiago dira etxeetako energia hornidura gastuei aurre egiteko zailtasunak dituzten familia eta norbanakoak. Esate baterako, 2017an Gipuzkoan egindako

EH Bildu talde politikoa

Grupo político EH Bildu

Ijentea, 1 - 20003 Donostia

Tel. 943481027 eh_bildu@donostia.eus - www.donostia.ehbildu.eus -

pobrezia energetikoa neurtzeko inkestaren arabera, 38.989 familiek dute gehiegizko energia gastua haien diru-sarrera mailarekin alderatuta. EAeko azkeneko datuak hartzen baditugu, 112.000 pertsona (EAeko familien %5,1) daude pobrezia energetiko egoeran.

Donostiaren kasuan, 3.008 familia (5.377 pertsona) izan ziren Gizarte Larrialdietarako Laguntzak (GLL) jaso zituztenak 2020an oinarritzko beharrei aurre egin ahal izateko. GLLen bidez banatutako 3.200.815,33 €etatik 968.621,04 € energia beharrak asetzeko erabili ziren.

Jakin badakigu argiaren prezioaren afera ez dela konpontzen diru-laguntzen bidez eta beste energia-eredu bat behar dugula. Egoerari buelta ematea ekar lezaketen neurrien artean daude irregulartasunak ikertzea, ate birakariak debekatzea (oligopolioaren eta botere politikoaren arteko eskualdatzea gogortzearen alde egiteko), autokontsumoa sustatzea eta energia-komunitateak sortzea, emakida elektrikoak publiko bihurtzea, energia enpresa publiko bat sortzea eta energiaren prezioa mugatzea. Baina, aldi berean, erakunde publikoaren betebeharra da biztanleriaren oinarritzko beharrak asetzeko baliabideak jartzea, diru-laguntzak barne.

Gauzak horrela, aurreikusi daiteke negu honetan hornidura elektrikoaren kostuari aurre egiteko zailtasunak ugarituko direla eta GLLen aurrekontu kontinuista batek ez dituela familia guztien beharrak asetuko. Izan ere, urteak dira Eusko Jaurlaritzak GLLak ordaintzeko jartzen duen aurrekontua ez dela nahikoa eta udalek diru-gehigarria jarri behar dutela. Donostiaren kasuan, 2020an GLLetan inbertitutako 3.200.815,33 €etatik Udalak 635.854,33 € jarri behar izan zituen, nahiz eta bere eskumena ez izan.

Horiek horrela, EH BILDU udal taldeak honako mozio arrunt hau aurkezten du:

MOZIO ARRUNTA

EH Bildu talde politikoa

Grupo político EH Bildu

Ijentea, 1 - 20003 Donostia

Tel. 943481027 eh_bildu@donostia.eus— www.donostia.ehbildu.eus -

- Donostiako Udaltzarak hertsatuki eskatzen dio Eusko Jaurlaritzari Gizarte Larrialdietarako Laguntzetan energia-gastuak ordaintzeko gehienezkoak eguneratzeko.
- Donostiako Udaltzarak hertsatuki eskatzen dio Eusko Jaurlaritzari, Gizarte Larrialdietarako Laguntzak Eusko Jaurlaritzaren eskumena izanik eta pobrezia-tasa saihesteko baliabide garrantzitsuenetako bat izanik, konpromisoa hartzeko 2022ko aurrekontuetan GLLak asetzeko behar beste diruz hornituko dituela aurrekontuak, haren eskumena dela kontuan izanik.

Donostian, 2021eko irailaren 10ean

Reyes Carrere Zabala

EH Bildu udal taldearen bozeramailea